

Prix Montagne 2018: Nominads èn era dus projects grischuns

DA GION NUTEGN STGIER / ANR

■ **Dals sis projects da regiuns muntagnardas per il Premi Prix Montagne 2018 derivan dus dal Grischun. Il «Quadrin» da la firma Uffer SA a Savognin e las turtas da nuschs da la Conditoria Sedrun.** Dapi il 2011 surdatan las organisaziuns Agid da muntogna svizzer e la Cuminanza da lavur da muntogna svizra il Premi Prix Montagne. Dotà è quel cun ina summa da 40 000 francs. L'emprim premi avant set onns ha retschet l'organisaziun da graun Gran Alpin cun sedia a Casti. Ils ultims sis onns èn bain stads nominads projects grischuns, dentant gudagnà il pre-

mi n'han els betg. Ussa stattan gist dus projects grischuns en concorrenza cun quatter ulteriurs projects per retschaiver a l'entschatta da settember il Prix Montagne u eventualmain il premi dal public dotà cun 20 000 francs.

Annunziads eran 19 projects grischuns

Sin dumonda da l'anr ha Ivo Torelli, il pledader da medias dal Prix Montagne, ditg che dal Grischun sajan vegnids inoltrads 19 projects dals total 49 projects. Dapi il 2011, cura che quel premi saja vegnì surdà per l'emprima giada, tutgia il Grischun tar quel chantun ch'inoltreschia ils

pli blers projects. Er da present sajan da quels 19 projects intgins da fitg buna qualidad e cun ina gronda persistenza. Dus da quels projects sajan nominads e quai cun raschun, ha ditg Torelli. Els adempleschian cumplettamain ils divers criteris dal premi. Nominà per il Prix Montagne è il Quadrin da la firma Uffer SA, Savognin, il modul da lain da construeir chasas, hotels, tribunas e bier auter. En concorrenza per vegnir tar onur stat er la Conditoria Sedrun da Reto Schmid cun ina producziun annuala da tschintg milliuns turtas da nuschs pitschnas. Ils 5 da settember vegn surdà a Berna il premi.



Il Quadrin, in product da renum naziunal da la firma Uffer SA a Savognin.



Enonuschentas er ordvart noss chantun èn las turtas da nuschs pitschnas da Sedrun.